



Broj: 03/7-02-1-859/25

Sarajevo, 4. 4. 2025.



BOSNA I HERCEGOVINA
PARLAMENTARNA SKUPŠTINA BOSNE I HERCEGOVINE
SARAJEVO

PRIMLJENO: 04.04.2025.			
Organizaciona jedinica	Klasifikaciona oznaka	Redni broj	Broj priloga

Parlamentarna skupština BiH
Kolegiju Doma naroda
Ustavnopravnoj komisiji Doma naroda

Na osnovu člana 97. st. (1) i (2) Poslovnika Doma naroda Parlamentarne skupštine Bosne i Hercegovine ("Službeni glasnik BiH", br. 58/14, 88/15, 96/15, 53/16 i 71/24) i čl. 1. i 2. Jedinstvenih pravila za izradu pravnih propisa u institucijama Bosne i Hercegovine ("Službeni glasnik BiH", br. 11/05, 58/14, 60/14, 50/17, 70/17 i 10/21), Zakonodavno-pravni sektor Zajedničke službe Sekretarijata Parlamentarne skupštine BiH daje sljedeće

Mišljenje

o

Prijedlogu zakona o izmjenama Izbornog zakona Bosne i Hercegovine

I. Zakonodavno-pravni sektor Zajedničke službe Sekretarijata Parlamentarne skupštine BiH (u daljnjem tekstu: Zakonodavno-pravni sektor) zaprimio je 4. 4. 2025. dopis predsjedavajućeg Doma naroda Parlamentarne skupštine BiH, broj: 02-02-1-859/25 od 2. 4. 2025, kojim se, u skladu s članom 97. stav (1) i (2) Poslovnika Doma naroda Parlamentarne skupštine Bosne i Hercegovine (u daljnjem tekstu: Poslovnik), dostavlja Prijedlog zakona o izmjenama Izbornog zakona Bosne i Hercegovine, čiji je predlagač Marina Pendeš, delegatkinja u Domu naroda Parlamentarne skupštine BiH (u daljnjem tekstu: Prijedlog zakona), radi davanja mišljenja o usklađenosti s članom 95. Poslovnika i Jedinstvenim pravilima za izradu pravnih propisa u institucijama Bosne i Hercegovine (u daljnjem tekstu: Jedinstvena pravila).

II. Zakonodavno-pravni sektor konstatira da je Prijedlog zakona podnesen od ovlaštenog predlagača u skladu s članom 94. Poslovnika.

U nastavku, Zakonodavno-pravni sektor cijenio je usklađenost Prijedloga zakona s članom 95. Poslovnika, te je konstatirano da je podnesen u skladu sa stavom (1) ovog člana Poslovnika, u pisanoj i elektronskoj formi na hrvatskom jeziku. Također, u skladu s članom 95. stav (3) Poslovnika, konstatira se da dostavljeno obrazloženje Prijedloga zakona sadrži elemente propisane članom 95. stav (3) tač. a), b), c), d) i g) Poslovnika. Uz Prijedlog zakona nije

dostavljeno mišljenje Agencije za zaštitu ličnih podataka u Bosni i Hercegovini o usklađenosti prijedloga zakona, koje se odnosi na obradu ličnih podataka, sa standardima zaštite ličnih podataka kao ni mišljenje Direkcije za evropske integracije o usklađenosti prijedloga zakona s pravno obavezujućim normama EU, kako je to propisano članom 95. stav (3) tač. e) i f) Poslovnika, a navedena mišljenja u skladu sa stavom (4) ovog člana Poslovnika pribavlja Kolegij Doma.

Uz Prijedlog zakona priložena je verzija prečišćenog teksta zakona te odredbe članova koji se mijenjaju, kako je to propisano članom 95. stav (5) Poslovnika.

III. U pogledu usklađenosti s Jedinostvenim pravilima, konstatira se da je Prijedlog zakona izrađen na način da odgovara nomotehničkim pravilima, odnosno da svojom strukturom, formom i stilom odražava pravila izrade pravnih propisa, kako je to i propisano Jedinostvenim pravilima.

Međutim, ukazujemo na sljedeće:

- Uvidom u tekst važećeg Izbornog zakona Bosne i Hercegovine, a s obzirom na to da je osnovni tekst Zakona kao i jedan dio izmjena i/ili dopuna donesen prije stupanja na snagu Jedinostvenih pravila, utvrđeno je različito nomotehničko označavanje unutrašnje podjele članova, odnosno označavanje stavova i tačaka. Također, utvrđeno je da Zakon ima 24 izmjene i/ili dopune i/ili ispravke;
- U članu 1. stav (5) Prijedloga zakona u posljednjoj rečenici potrebno je brisati broj pet u zagradi „(5)“ s obzirom na to da se u tekstu propisa brojevi do deset pišu slovima, u skladu s članom 45. Jedinostvenih pravila;
- U članu 1. st. (5) do (9) Prijedloga zakona nedostaje puni naziv institucije Parlamentarna skupština Bosne i Hercegovine, odnosno iza riječi: „Parlamentarne skupštine“ potrebno je dodati riječi: „Bosne i Hercegovine“;
- U članu 2. stav (6) Prijedloga zakona potrebno je iza riječi: „Izbornog zakona“ dodati riječi: „Bosne i Hercegovine.

S obzirom na to da se Izborni zakon Bosne i Hercegovine sastoji od osnovnog teksta i 24 izmjene i/ili dopune i/ili ispravke, ukazujemo na član 46. Jedinostvenih pravila (Svrha i obim izmjena i dopuna) u kojem se navodi da je, ako je više od polovine članova važećeg propisa već izmijenjeno, odnosno dopunjeno ili se predlaže izmjena, odnosno dopuna jedne trećine propisa, potrebno pristupiti donošenju novog propisa, kao i da je nakon treće izmjene, odnosno dopune propisa potrebno pristupiti donošenju novog propisa.

Također, u članu 54a. Jedinostvenih pravila (Novelacija teksta propisa) navodi se da novelirani tekst propisa predstavlja ukupnost važećih odredbi jednog propisa koji je više puta mijenjan, dopunjavan i ispravljan ili u smislu forme nije usklađen s odredbama Jedinostvenih pravila.

Zatim, u članu 67. Jedinstvenih pravila (Revizija postojećih propisa) navodi se da institucije Bosne i Hercegovine, kako bi se izbjegle situacije u kojima propisi postaju zastarjeli, nedosljedni ili loše izrađeni, uspostavljaju sistemske i periodične revizije postojećih propisa, a kao preduslov za reviziju propisa navedena je novelacija teksta propisa iz člana 54a. Jedinstvenih pravila.

Rukovodilac
Zakonodavno-pravnog sektora


Bojan Šehovac

Dostavljeno:

- naslovu;
- a/a.